

# Lukim

# SABA NA SHARZY...

## Pilai long Lae na Mosbi long mun Epril

Neville Choi i raitim

TUPELA biknem musik atis bilong Solomon Ailans husat i gat planti sapota bilong ol insait long PNG nau bai bung wantaim na kam pilai raun long Lae na Mosbi long mun Epril.

Yes ya. Dispela mangi Solomon Ailans husat i bin kam pilai raun long SP Ailan Wei tua bilong em las yia, Sharzy, nau bai kam bek gen long promotim nupela musik albam bilong em. Tasol em bai no inap kam em wan. Nogat tru. Em bai kam wantaim narapela musik man bilong Solomon Ailans we musik bilong em i wok long pairap strong moa insait long PNG - Saba.

Man husat em i bin wok hat tru long kisim dispela tupela lain i kam em Dennis Seeto, man husat i go pas long stretim rot bilong PNG Ragbi Tas Tim husat bai makim kantri long 2007 Saut Pasifik Gems long Samoa.

Tingting bilong kisim tupela biknem musik man long ausait long kantri long halivim long wok fan resing i bin kamap taim. Dennis na meri bilong em Anna i bin givim mani bilong ol yet long halivim sampela spot manmeri long go pilai ragbi tas long 2003 Saut Pasifik Gems.

"Ol i bin makim mi olsem miks kosa long las minit tru na tenpela



Logo piksa bilong Tripel Tas Daun Tua bilong Saba na Sharzy we ol i laik traim halivim ol ragbi tas tim bilong makim PNG long 2007 Saut Pasifik Gems.

### Tiket Prais:

Lae - Ol Nait Klab (K30)  
Lae - Ausait bilong ol Bikmanmeri (K20)  
Lae - Ausait bilong ol pikinini namel long 7 na 15 krismas (K10)  
Mosbi - Kantri Klab (K30) Ol Memba (K20)

**Ol Bikpela Sponsa:**  
Corporate Touch Lae

**Ol Liklik Sponsa:**  
Power Haus Studios, 94.7 FM Morobe na POM Country Club

tas pilaila i no bin inap long baim ful lev i inap long K2,000. Em nau mipela i halivim ol wantaim hap

mani bilong mipela na mipela i salim ol i go long gems. Antap long dispela, mipela i bin opim rot bilong ol long traim sampela pilai long Brisben pastaim long ol i go long Fiji.

"Hatwok i bin karim kaikai taim mipela winim brons medel, maski mipela i no bin i gat inap pilaias. Olsem nau nau mi gat strongpela tingting long redi gut bilong 2007 Samoa Gems bilong olgeta divisin olsem open mens, open wimens, na open miks. Na sapos mi mas i gat olgeta dispela divisin bilong go makim PNG, mi mas mekim wanpela bikpela samting. Olsem na mi kamapim dispela Tripel Tas Daun Tua," Dennis i tok.

Dennis i stori olsem em i bin tok-tok wantaim Sharzy long kamapim wanpela PNG tua wantaim Kopret Tas long mun Oktoba las yia yet.

Tasol bikos em i bin gat agrimen wantaim Totol Iven Kampani na Nau FM long SP Awots, ol i no bin inap long makim wanpela taim inap nau bikos em i redi long lon-sim nupela albam bilong em.

"Pastaim mi no bin inap kisim ol telepon namba bilong em, maski mi traim kisim ong CHM o Nau FM. Tasol mi bai laki tru long mi gat wanpela poroman husat i bin painim wanpela lineil adres bilong Radio Solomon Brotkasting Komisin. Em nau em i givim mi



**SABA RAUN:** Saba (sanap long raithan), man we singsing bilong em i wok long pulim lau bilong planti pipel nau insait long PNG bai kam pilai raun long Lae na Mosbi siti long mun Epril.

namba bilong Sharzy," Dennis i tokim *Wantok Niuspepa*.

Long sait bilong Saba, Dennis i tok em i bin laki long kisim liklik stori bilong em long Sir Nagora Bogan na Lady Bogan husat i bosim Power Haus Records bikos Saba i rekot wantaim ol. Sampela mun i bin lus bipo Dennis i bin kisim telepon namba bilong em long Sir Nagora na Lady Bogan.

"Mi no bin laik autim tingting bilong mi taim mi kisim long wanem em i bin gat tok wanbel i stap wantaim Yumi FM pinis, na mi no bin laik bagarapim dispela tok wanbel em i mekim pinis. Tasol bihain long en, mipela i save tok stori olsem ol brata stret.

"Dispela tupela man Saba na Sharzy em ol gutpela man tru. Sharzy em i no save toktok tumas, tasol Saba em i man bilong tok pilai tru," Dennis i tok.

Dennis na famili bilong em i givim bikpela halivim long Ragbi

Tas insait long Lae na long makim kantri long 2003 SP Gems.

Nau em i wokabaut long strong bilong em yet long kisim dispela tupela Solomon Ailan musik atis i kam long sapotim PNG Ragbi Tas tim.

"Mani bilong sponsaim dispela tua i no kam long wanpela bikpela sponsa kampani. Nogat tru. Em i kam long mani bilong mi yet olsem na sapos em i kamap gut, em bai gutpela. Sapos nogat. Em bai nogat nau.

"Mi laki tru olsem Pot Mosbi Kantri Klab (POM Country Club) na Power Haus Records na 94.7 FM Morobe i bin givim mi liklik diskaun bilong ol sevis bilong ol.

"Mi laik askim tas komyuniti long Lae na Pot Mosbi long sapotim dispela tua long wanem olgeta mani mipela i mekim bai go long ol nambawan pilaila bilong mipela long makim PNG long 2007 SP Gems," Dennis i tok.